

TRIBUNAL ELECTORAL del Poder Judicial de la Federación

Asunto: Juicio para la Protección de los Derechos Político-Electorales del Ciudadano.

Expediente: SUP-JDC-11/2007.

Tema: Condiciones de renovación de concejales en el Ayuntamiento de Tanetze de Zaragoza, Oaxaca.

Lengua indígena: Zapoteco.

Xtidzi gitxi: Juwis le Runtxi'i yuku Deretxi kie Bunatxi Gakikane Bini Yu'ulhowi lhen Guzokane Bini Yu'ulhowi.

Gitxi nagatxi: SUP-JDC-11/2007.

Didza: Ka zó dérá le guki na rutsa'kane zurá autoridà kiei Yu'ulhowi kiei Tanetse, Lula'.

Didza gulha walhadzi ga gudidikane gitxi: Didza Xidza, Xtidze bini gá lhen bini mixi.

Lu yu'ulhowi kie Tanetse yidzi xidza kie Lula', Zagita (Mèjikù), dére autoridà kiekane tazie kargu kiekane lhen tuzógarikane autoridà kiekane naridubi déra yidzi lu dxinlhowi ga ridza' autoridà, kanha runtiskaskane lhen yulhókane gate gulhaj yidzido nhí.

Zan na'à, lu dxinlhowi gultsee autoridá kiekane iza 2006, autoridà xtilha gulabije gitxi ga tagixj'ikane ga biti gaki gutsa'kane autoridà kie yu'ulhowi kánha runtiskaskane. Deklarasionnhí, gulabije lei bini lhowi kiei Consejo Generalhi kie Instituto Estatalhi Elektoralhi kie Lula', kanha ruwilhàzi gitxi bizuje bini zue' lhowi Yu'ù ga Ribekixbákane ka Tuzókane Autoridà kiekani yuku Yidzi Walhadzi. Le nhaki zité bayùdxi nuzujakane lu gitxínhi ruwilhàzi lhen rigixji'ni nhaki kom zé ba nhàdxi kie udila lu yidzi lhen nhàdxi yulaginàj kánhí rutubi kuinkane lu yidzi xtilha na ruzókane autoridà kiekane txiba ilune kanha rutubi kuinkane bini lu yidzi walhadzi.

Ùdxinha, Legislatura kie Lhatxi Lula' gulabije Gitxílhí nalhabí 365, ga raki'henhe tu akuerdo lhen deklarasiòn kiei Consejo Generalhi kie Instituto Estatalhi Elektoralhi kie Lula' ga nazuja ke biti dé lhataj ga gutubi kuinkane bini yidzi ga gutsa'kane autoridà kie yu'ulhowi kie Tanetse, lu dxinlhowi yidzi kie iza 2006.

Kanhi gukinhi, bini zian bituba kwinkane ga gudzagakane deklarasiòn kie Consejo Generalhi kie Instituto Estatalhi Elektoralhi lu Tribunalhi Elektoralhi kie Poder Judisialhi kie Federasiòn (TEPJF). Bini yidzinhí gulanhákane ke lhen gitxinhí tudzagakane deretxi kiekane guzókane autoridà na ti tudidelekane gutsa'kane autoridà kiekane kanha runkaskane.

Lhen kánhí guki, gulunhe reklam ke gate iza 2002, ti rutsagarikane autoridà kiekane kanha runkaskane, lhengaka dedel ga txi gulade' gululizikane gitxi lhenkane auroridá lu gil'a, lu'a lhen Mèjikù.

Lhen gulanhe' ka ke, lu deklaratoria ga guluzuje' ke ti dégarí lhataj gutsa'kane autoridà kiekane ka runkaskane yuku iza, guluzujakane lei lhen biti bitxi'akane dxi'à bi rakígàrì lu yidzinha lhen biti gulagixjì'ikane bunatxi.

Lhen kanhi gukì nhí, gulanhákane ke gulagókane deretxi kiekane ga gakikane bìnithowi lhen guzokane bini yu'ulhowi, kom kanha guluzujakane lu deklarasionnha ti nhungaríkane lei yelalhí lhen ti gululhuwine ka bitxi'ákane lei.

Lu gitxi ribekixbákane, bini lu Sala Superiorí kiei Tribunàlhi Elektoralhi kiei Poder Judicial kiei Federasion (TEPJF) gululhuwikane ke lu Dekreto nalhabì 365 biti gudidì yelalhí kiei riyadzajgarì ga ka gaki kwijakane lei. Le zijan, ke ti gululhuwikane txiba klunkane dxi'à xtxinkane, le tsazajnhì'ì bixkienha bizujakane lu gitxi ke ti gaki gutsa'kane autoridà lu yu'ulhowi kiekane ka runtíkiskane kom zé banhadxi lhen udila.

Bini lu Salanhí gulhekixbákane ke, Kongreso kie Lula', tuzi bita'ákane yelalhí kiei bix kienha ti gukì gulutsa'kane autoridà kiekane, lhenka déra le gaki ilunhe nazuja lu gitxilhí kiekane organo legislatibo lhenhe bini zue' lhowi kie déra yidzi Lula' gake guzue' le tue bini gudunlhowe yu'ulhowinhí lhenka yazike autoridà; zan biti gulanhákane bixkienha zégarì ba nhadxi, udila lhen ga yulaginaj ka zókanì lhixi gobiernì.

Nhá za ka, gulanhakane ke akuerdo lhen deklaración kie Consejo Generalhi kiei Instituto Estatalhi Elektoralhi leskare gitxi gulabije biti gudidì lhen gùlì déra yelalhí riyadzajgarì ga ka' gaki gulhuwikane lei lhen bini yidzi. Le gukinha, le bíti gululhuwine nhakì nhakx gulunkane gulutxi'akane dxi'à lhen tulhizi ga ka' gukì yulanhakane bix kienha ti dégarì lhataj gutsa'kane autoridà yu'ulhowi kiekane.

Na gulutxí'le dxi'à, lu Sala Superiorí kiei TEPJF gulanhákane ke le nhà zé banhadxi lhen yelaudilì ti gaki yulugunkane dxin parì gudzagakane bunatxi síkane deretxi kiekane gutsa'kane autoridà lhen, ke kanhi tunhe tuzókane lhen tutsee autoridà kiekane, nhakìre dxi'à lhen yelalhí lhen nanìzi kanha tunhe tuzokane autoridà kiekane lu zianì yidzi gulha lhen rala gunbékane lei lhen yuluntxi'è. Lhen walhazi kie le nuzujakane lu gitxinhà, gulanhákane ke bini yidzinhí, nhakì deretxi kiekane guzókane lhen gakikane autoridà na rutsa'kane déra autoridà kie yu'ulhowi kie Tanetse lu dzanha nuzókane iza iza.